



18. juni 2007

Inatsisartut Forretningsorden-iani § 36 imm. 1 tunngavigalugu apeqquteqaatit makkua Naalakkersuisunut apeqquteqaatigaakka:

**Arctic Greenfood-ip tunineqarneranut tunngatillugu Naalakkersuisunut apeqquteqaatit.**  
(Inatsisartunut ilaasortaq Jens B. Frederiksen)

8. juni avammut tusarliunneqarpoq Arctic Green Food-ip (AGF) nunaqarfinni tunisassiorfiutaa-sa sinneri ingerlatseqatigiiffimmit Greenland Venture A/S-imit kiisalu Daycatch A/S-imit pigineqartumit tiguneqarsimasut. Ingerlatseqatigiiffiup nutaajusup ateq Arctic Green Food-imik tigusi-soq KNR-ip avammut tusarliussinera naapertorlugu pigineqarpoq Greenland Venture 49%-imik Daycatch 51%-imik.

Kiisalu KNR-ip avammut tusagassiinera naapertorlugu direktør Tønnes Berthelsen AGF-imi nu-taami pisortatut ingerlaannassasoq.

Inatsisartut Forretningsorden-iani § 36 Imm. 1 tunngavigalugu tunisisimaneq tunngavigalugu Naalakkersuisut apeqquteqaatinik makkunangga apeqquteqaateqarfiginiarlugit kissaatigaara:

1. Tunisassiorfinnik 9-nik tunisisimaneq qanorpiaq ingerlanneqarsimava? Tamatumunnga atatillugu allanik pisiniartunik soqutiginnittoqarsimanersoq paasissallugu kissaatigaara, kiisalu Naalakkersuisut tunisinermi akuusimanersut imalluunnit tuniniaanermut tunngatillugu ilisimasaqarsimanersut paasissallugu kissaatigaara.
2. AGF-imik sullissinissamut isumaqatigiisummik ingerlatsiinnarnissaq pisariaqatinneqar-nersoq Naalakkersuisut aalajangiusimavaat, tassami suliffeqarfik maanna namminersor-tumik ingerlanneqalereermat? Tamanna pisariaqartinneqartutut nalilerneqarpat taava Naalakkersuisut siunertarissannginnerlugu AFG-ip pisortaniit tapiissutinik pisariaqatitsi-nera ingerlaavartumik millisikkiartuarneqassasoq?
3. Tunisassiorfiit 9-t pineqartut, maanna tunineqareersut iluanaarutikiffiunerpaajussasut ili-magisariaqarpoq. Tamatuma saniatigut nalinginnaasumik ilisimaneqarpoq AGF-ip / Nu-ka A/S-ip tunisassiorfiutai aserfallatsaaliinikkut annertoorujussuarmik kinguussaaqqaso-rujussuusut. Tamakkua tunngavigalugit paaserusunneqarpoq ingerlatseqatigiiffiup tuni-sassiorfiit 9-it pineqartut qanoq akilerlugit pisiarisimanerai.
4. Tamakkua tunngavigalugit naatsorsuutigineqarsinnaavoq tunisassiorfiit 9-it pineqartut naleqartutut isigineqaatigisinnaassat tassaasoq Namminersorerullutik Oqartussat inger-



latseqatigiiffiullu akornani sullissinissamut isumaqatigiissutaat, tassungalu atatillugu naluneqanngilaq tunisassiorfimmuut ataatsimut kr. 280.000 qaammammut akiliutigineqartut, tassa ukiumut katillugit kr. 30 millionit. Tunisassiorfiit sullissinissamik isumaqatigiissutit aqqutigalugit pissarsiarisartagaannut naappertuuttumik akilersillugit tunineqarsimasutut Naalakkersuisut nalilerpaat?

5. Sullissinissamut isumaqatigiissutit aqqutigalugit AGF-ip pissarsiarisartagai najukkani sulisut suliassaqqartinnerisigut taavalu tunisassiorfimmuut tunisaqarnikkut illuatungilernissaannut tunngatillugu Naalakkersuisut qanoq qulakkeerinnipaat?
6. 14. juni KNR-ikkut tusarliunneqarpoq Royal Greenland A/S-ip tunisassiorfimmuut AGF-imit pisiareqqammikkaminit tunisassiorfiit marluk matusimagai, kiisalu taakkunani sulisut soraarsissimallugit, tassagoq tunisassiorfiit sinnerisa imminut akilersinnaasumik ingerlanernissaannut naleqqussaanissaq siunertaralugu. Taakkua tunisassiorfiit matunissaat pisariaqartutut isigineqarsimavoq, tassami tunisassiorfiit pineqartut sullissinissamut isumaqatigiissummik pigisaqarsimanngillat. Ilimagineqarsinnaavoq tamatuma kingorna Royal Greenland A/S-ip tunisassiorfiit imminnut akilersinnaanerulersimanissaat naatsorsuutigissagai. Naalakkersuisut tamakkua tunngavigalugit AGF-ip ukiumut 30 mio. kr.-inik ingerlatsinermut tapiiffigineqartarnerata pissusissamisut atorineqarsut pillugit nuutamik nalilersoqqinnissaannut piffissanngorsorinnglaat?
7. Siusinnerusukku AGF/Nuka aningaasarpassuarnik akiitsoqarpoq. Suliffeqarfik taanna maannakku atorunnaarsikkiartuaarneqarpoq, taakkualu suliassartaat tuniorarneqareerlutik. AGF-ip akiitsutoqai KNI-p pigisaani atorunnaarsikkiartuaarneqartumi inissisimaannassappaat, kiisalu taamatut inissisimaannassappata KNI-ip ukiuni aggersuni naatsorsuutai qanoq sunniuteqarfigissavai?
8. Tunisassiorfiit 9-t pineqartut tunineqarnerannut tunngatillugu periutsit taassuma tungaanut atorineqartut 100%-imik naammaginartutut Naalakkersuisut isigivaat?
9. Greenland Venture-imut piginnittunut sinniisutut Naalakkersuisut AGF-ip tunisassiorfimmuut suliffeqarfiup tiguseraneranut atatillugu tamakkiisumik naammagisimaarinnipaat?
10. AGF-ip pisortanit tapiiffigineqartarnerata ingerlaannarnissaanut naggataatigut siunertap inuiaqatigiinnut qanoq iluaqutaatigineranut misissuinermit periuseq suna Naalakkersuisunit atorineqarsimava? Tamatumunnga atatillugu paaserusunneqarpoq, inuiaqatigiinnut iluaqutaanera periutsit allat atorlugit anguneqarsinnaanersoq misissorineqarsimanersoq.



11. AGF 2006-imi 37,3 mio. kr.-inik amigartooruteqarpoq. Naalakkersuisut siulittaasuata 16.11.2006-imi Marie Fleischer-imut apeqquteqaataanut akissuteqarnermini oqaatigaa amigartoorneq tamanna suliffeqarfiup ataatsimoortumik aqunneqarneranik kiisalu tunisassiorfiit ataasiakaat aqunneqarnerannik naammaginangitsumik ingerlanneqarsimasumik ilaatigut pissutinneqartoq. AFG-ip 2006-imut ukiumoortumik nalunaaruteqarnerani aammattaaq takuneqarsinnaavoq tunisassiornerup kiisalu tunisassianik tunioraanerup ataqatigiinngitsumik ingerlanneqarsimanerata kingunerisaanik ukiup 2006-ip ilaani, soorluttaaq aamma 2005-mi taamaassimasoq, tunisassiat tunineqarnissaannik innimineriikkat restordrenik taaneqartartut annertuut uninngasuutigineqartarsimallutik, tamannalu ilutigalugu tunisassiat allat tunisassiareriikkat kisiannili suli tunineqanngitsut/tuneqqinneqanngitsut annertuut toqqorsivinni uninngasuutigineqartarsimammata. Aammattaaq takuneqarsinnaavoq ukioq 2006-imi sulisunut aningaasartuutigineqarsimasut 43,1 mio. kr.-iusimasut, naak aningaasatigut pilersaarutini sulisunut aningaasartuutissat 34,6 mio. kr.-iutinneqarsimagaluartut, aningaasatigut pilersaarutitut naleqqiullugu 8,5 mio. kr.-inik atuiffiunerusimavoq. Naggataatigullu AGF-ip isertitatigut akileraaruteqarnermut inatsisip § 107 a, tassa sulisut akileraarutaasa A-skat-it akilernerqarnissaannut tunngasumik sisamariarluni unioqqutitsisimanermit suliffeqarfiup pisortaa 2006-imi erseqqivissumik akisussaasuusimavoq. Tamakkua ataatimoortillugit isigissagaanni takuneqarsinnaavoq suliffeqarfiup aqutsisui, tassa uvani suliffeqarfiup pisortaa pineqarpoq, suliassaminnik naammassinninnissamut piginnaassuseqarsimanngitsut. Naalakkersuisut tamakkua pissutigalugit allamik naliliinissamut pissutissaqarsorinnginnerlugu, kiisalu Naalakkersuisut Greenland Venture aqutigalugu AGF-imut piginneqataanermikkut pisortap pineqartup AGF-imi nutaami pisortatut ingerlaannartinneqarnera toqqissisimanartutut isigaat?
12. 6. juni 2007 Naalakkersuisut ataatigut atsiortumut akissuteqarnerminnut atatillugu KNI-p aningaasaqarneranut atatillugu nalunaarutigaat Naalakkersuisut suliffeqarfinni pisortanik pigineqartuni suliffeqarfiit ukiumoortumik ataatsimeersuarnerinut atatillugu suliffeqarfinni aqutsisut, tassa pisortat. immikkut ajunngitsorsiaqartinneqarnissaat pilersaarutiginngikkaat. Allatut oqaatigalugu tamanna isumaqarpoq Naalakkersuisut apequtini pineqartuni akulerunnissartik kissaatiginngikkaat, kiisalu Naalakkersuisut isumaqartut KNI-ip siusinnerusukkut pisortarisimasaa 2006-imi **ULLORMUT Kr. 15.000,00-it sinnerlugit\*** ajunngitsorsiaqartinneqarneranera pissusissamisoorluinnartoq! Tamanna tukkornerisuaq "illuatungilerniarlugu" pisortaasimasup pineqartup suliffeqarfissuaq 2006-imi kr. 250 mio.-inik amigartooruteqartippaa. Tamatumunnga atatillugu pineqartopq soraarsinneqarpoq, malitsigitiinnangajallugulu pisortat suliffeqarfiutaannut allamut atyorfinitsin-

---

\*8,152 mior. Kr, ullunut 545-nut agguarlugit, assigaa qaammatit 18-t, tamannalu piffissaq ajunngitsorsiaqartitsinnermut atatillugu qaffasinnerpaaffianiitinneqartutut isigisariaqarpoq. Allatut oqaatigalugu qularnangitsumik ajunngitsorsiaritinneqartut annertunerusumassapput.



neqarpoq siusinnerusukkullu politikkikkut pisortariasimasaminik qullersalerneqarluni.

- a. Naalackersuisut suliffeqarfinni pisortanit pigineqartuni pisortaasimasut taama tukkortigisumik ajunngitsorsialersorneqarnerat pissusissamisoortutut isigaat?
- b. Kalaallit-nunaanni nalinginnaasumik aningaasarsiatigut qaffasissutsip inissisimamera eqqarsaatigissagaanni taamatut ajunngitsorsialersuineq naapertuilluartutut Naalackersuisut isigaat?
- c. Taamatut pissusilersorsimaneq ilumut Naalackersuisut ileqqorissaarnertut isigaat?

13. Tamatumunnga tunngatillugu Naalackersuisut paasissutissanik allanik tunniussaqaarsinnaappat?

Apeqquteqaatit ullumimiit sapaatip akunneri pingasut qaanngiutsinnagit allakkatigut imaluunniit qarasaasiakkut allakkatigut kalaallisut qallunaatullu akissuteqarnissaq inussiarnersumik qinutigissavara qanasaasiami allaffissamut [jbfr@gh.gl](mailto:jbfr@gh.gl) -imut kiisalu assilinera [landstinget@gh.gl](mailto:landstinget@gh.gl) -imut nasiunneqarnissaat kissaatigaara.

Inussiarnersumik inuulluaqqusillunga

Jens B. Frederiksen  
Inatsisartunut ilaasortaq